



A Rem, di cuant che al jere partît, i plaseve tornâ ogni an des sôs bandis, cuant che la fumate, il frêt, la nêf o la ploie a fasevin di parons. Al rivave tal so paîs d'Invier e si lu viodeve ogni dì, torzeonâ par chês monts e par chei plans che di frut al cognosseve come lis sôs sachetis.

Nol saveve nancje lui parcè che al tornave in chês campagnis cence colôrs, in chê tiere cussì dure e frede. La stesse che fin di frut i pleave la schene. Di sigûr, al tornave te sô panze, lûc di sanc, di fadie e di pan, parcè che lì a jerin soteradis lis sôs lidrîs, smenteadis cul passâ dai agns, dai carnevâi che van e che vegnin come lis stagjons.

In chê dì la fumate e jere tant penze che dulintor nol jere sterp, arbul che nol fos stât glotût in chel grisôr. Parfin i ucieluçs di chê stagjon, che ogni tant si viodevin saltuçâ fra lis cjarandis, cui sa, indulâ che si jerin platâts.

E in chel mont cussì spetrâl, Rem, al lave indenant cence savê indulâ che al jere diret. Al cjaminave, cjaminave e dut intun moment al viodè che cualchidun al jere diret de sô bande. Dal so vistût al pareve un sorestan. Elegant: golarine e cun tant di cjapiel.

Man man che si vicinave i pareve dut par so pari, vistût cu la stesse mude che lu vevin vistût la zornade dal so funerâl. Si al jere propit lui, ma par tant che al jere spedît i passâ denant cence dî une peraule.

O miôr fevelant di bessôl, ma intune lenghe che Rem nol podeve capî. Intant, no tant lontan, si faseve indenant cu la cuarde inte man, Guerino. I siei voi di frut, come in vite, a jerin ridints ancje se ancjemò fûr dal cjâf come in che dì che si jere picjât.

E vele là ancje Anute, sô agne, muarte di un pieç ancjemò fantate, cun tal braç il fradi di Rem, muart a pene nassût.

Che sfilze di cristians lâts par simpri a durmî sù là culine no veve fin. E velu là, “Simpri in Plene”, cussì lu clamavin intal paîs pes sôs epichis cjochis. Infin, no podeve mancjâ, la ombre di Mirco, chel partigjan fusilât su la mont dai todescs il dì di San Marc, un an prime che e finissi la vuere.

Chê schirie di animis claris, in tante bonace, une daûr che altre, al pareve che a vessin riscjaldât ogni robe, tant che la fumate si jere sraride.

Il frêt in tai pîts e tes mans a Rem i jere passât. Ancje chê lorgne che al veve a buinore si jere disfate cul soreli aromai alt a misdì. Chês animis buinis, i vevin lassade tal cûr tante sperance. La stesse che Mirco al veve sot di chê rosse cjamese denant dal ploton in chê dì che lu àn fusilât.

di Nello Malisano